

# Tigar u zatvoru

Abdić je više puta osuđivan – uglavnom uslovno, dok je 2007. godine pravomoćno osuđen na dvije godine zatvora.

U ovom slučaju, Abdić je optužen da je počinio krivično djelo razbojničke krađe i razbojništva. Vrhovni sud Federacije BiH je prije dvije godine potvrdio presudu protiv njega i Emina Pivića zbog pokušaja iznude 200.000 DEM od Nedžada Bajrića. U presudi stoji da su Abdić i Pivić, kako bi iznudili novac, Bajrića udarali po glavi i ostalim dijelovima tijela a potom su mu ispalili metak u nogu i ostavili ga na mjestu zločina. Tada su mu uzeli mobitel, sat i automobil.

Prošle godine Abdić je pristao na razgovor sa novinarima Centra za istraživačko novinarstvo (CIN) iz Sarajeva. Intervju koji je vođen u Bihaći, gdje je Abdić nastanjen, rađen je u sklopu projekta o stanju bh. nogometa i odnosio se na probleme sa zakonom zvaničnika Nogometnog saveza BiH, među kojima je i Abdić. Ratni komandant je tada rekao da je nevin i da su mu sve namjestili njegovi protivnici.

Kasnije je Abdić nastojao da izbjegne odlazak na odsluženje dvogodišnje zatvorske kazne pravdajući to zdravstvenim razlozima što je sud nekoliko puta i uvažio. U intervjuu za CIN je rekao da se nada da zbog zdravstvenih razloga neće odslužiti kaznu.

Kada se zadnji put nije odazvao pozivu suda za izdržavanje kazne, za njim je izdata potjernica i uhapšen je ispred hotela Hercegovina gdje je bila smještena nogometna reprezentacija BiH koja se pripremala za odlazak u Estoniju na jednu od najvažnijih kvalifikacionih utakmica za svjetsko prvenstvo u Južnoj Africi 2010 godine.